


順正理論

才七十五

四百四
操五

50760



阿毗達磨順正理論卷第七十五

操

尊者眾賢造

三藏法師

玄奘奉

詔譯

辨智品第七之三

如是已辨諸智差別智所成德今當顯示於
中先辨佛不共德且初成佛盡智位修不共
佛法有十八種何謂十八頌曰

十八不共法 謂佛十力等

論曰佛十力四無畏三念住及大悲



如是合

名為十八不共法唯於諸佛盡智時修餘聖
所無故名不共且佛十力差別云何頌曰
力處非處十 業八除滅道 定根解界九
徧趣九或十 宿住死生俗 盡六或十智

宿住死生智

依靜慮餘通

瞻部界佛身

於境無礙故

論曰佛十力者一處非處智力具以如來十智爲性爲依何義立此力名佛於經中自作是說苾芻諦聽如來於處如實知處如來於非處如實知非處乃至廣說知一切法自性功能理定是有名爲處智知一切法自性功能理定非有名非處智此智通緣情非情境與一切智皆不相違恐於略說少功難悟故復此中析出餘九如薄伽梵多界經中自廣分別處非處義身等惡行感非愛果定有是處感可愛果必無是處乃至廣說於彼經中

所未說者我依餘教復略分別謂諸如來猶有誤失諸應分別而一向記無力無畏三念任等不共功德必無是處諸聖猶起見所斷惑覆罪墮惡必無是處造無間者現身見法墮邪性者現入正性外道法內有真沙門有雖受生而無有死有不還者復欲界生有阿羅漢更受後有有捨二種識猶現行處有三界有十九蘊有第六世有第四諦有第五必無是處如來所使有能遮遏世尊使者事未究竟正在慈定滅盡定中隨信法行者有能為損害此俱盧死墮惡趣中及有中夭必無是處諸行不滅涅槃無常異生有能斷有

頂惑於一相續二心俱行無漏爲因招異熟
果五識得與覺支相應眠夢位中有生有死
得果退等必無是處有五識身無尋無伺緣
名過未離世爲境有鼻舌識有覆無記有生
上界入現觀者有耳見色有眼聞聲舌嗅香
等必無是處如是等類得非處名與此相違
皆名是處豈不處智已知非處諸非處智亦
已知處何勞雙說處非處名雖理實然而雙
說者爲欲遮止無因論故說是處名爲欲遮
止惡因論故說非處名依一智體雙說無失
寧知於一處非處力中恐略難悟拮出餘九
力以餘皆有此力義故謂如實知惡行能感

可愛異熟妙行能感非愛異熟必無是處與
此相違定有是處又如實知順退分定能逮
勝德順勝進分能引退墮必無是處與此相
違定有是處又如實知若此品根能證此果
此根未滿此果已證必無是處與此相違定
有是處又如實知下劣勝解鄙惡喜樂能逮
勝德必無是處與此相違定有是處又如實
知諸有情類界性各別而情契合必無是處
與此相違定有是處又如實知趣生死行能
證涅槃繫趣涅槃行能招生死必無是處與此
相違定有是處又如實知前際有始必無是
處與此相違定有是處又如實知未斷生結

死已不生或彼已生畢竟不死或彼不往善
趣惡起必無是處與此相違定有是處又如
實知非理作意能得漏盡必無是處與此相
違定有是處我於如是一一力中略與方隅
顯處非處若盡其事言論無窮故應皆名處
非處力恐略難悟別立異名二業異熟智力
八智爲性除滅道智謂善分別如是類業感
如是類諸異熟果無罣礙智名業異熟智力
或說名爲自業智力謂善分別如是類果是
自所造業力所招非妻子等所能與奪如是
類業必招自果不可貿易無罣礙智名自業
智力又佛自說此力相言苾芻諦聽佛於過

去未來現在諸業法受別處別因別事別果
皆如實知乃至廣說諸業有三法受有四業
及法受故名爲業法受或業之法故名業法
即是諸業之品類義此顯如來於過去等諸
業品類處等差別及所受果能如實知此中
別處者是別方所義知於某處造如是業當
於某處此業方熟謂知此業天等處造此業
當於人等處熟是名如實了知別處言別因
者是別緣義知如是業遇此緣熟或知此業
由此緣造是名如實了知別因言別事者是
別物義知如是業至成熟時力能引生色等
別物或即知業自性不同名知別事謂知此

業此物爲性餘則不然是名如實了知別事
言果別者即別異熟義知如是業定感異熟
果此業不定能感異熟此業異熟經介所時
有不介者此業異熟尚有所餘有無餘者如
是等類異熟差別極細難了而能了知是名
如實了知別異三靜慮解脫等持等至智力
四根上下智力五種種勝解智力六種種界
智力如是四力皆九智性唯除滅智謂如實
知諸靜慮等自性名得方便攝持味淨無漏
順退住進決擇分等無罣礙智名靜慮等智
力又佛自說此力相言苾芻諦聽佛於靜慮
解脫等持等至離染清淨安立皆如實知乃

至廣說靜慮等相定品當辯雜染謂能障證
靜慮等清淨謂即此諸法清淨諸淨法住名
爲安立或順退分名爲雜染順勝進分順決
擇分名爲清淨順住分名安立若如實知諸
有情類能逮勝德根品差別無罣礙智名根
上下智力又佛自說此力相言苾芻諦聽佛
於有情諸根上下皆如實知乃至廣說此意
顯佛知諸有情諸根勝劣無有謬誤雖有中
根而待勝劣是劣勝攝故不別顯此中根名
爲目何法謂目信等斷善根者揔相續中亦
有去來信等善法或目意等若如實知諸有
情類喜樂差別無罣礙智名種種勝解智力

又佛自說此力相言苾芻諦聽佛於有情種
種勝解皆如實知乃至廣說此意顯佛知諸
有情喜樂種種品類差別喜樂勝解名差別
故若如實知諸有情類前際無始數習所成
志性隨眠及諸法性種種差別無罣礙智名
種種界智力又佛自說此力相言苾芻諦聽
佛於世間種種界非一界皆如實知乃至廣
說種種界者顯各別義非一界者顯衆多義
應知此中界與志性隨眠法性名之差別如
是四力並緣有爲故十智中唯攝九智七徧
趣行智力或聲顯此義有二途若謂但緣諸
能趣道九智除滅若謂兼緣道所趣果十智

爲性謂如實知生死因果及知盡道無罣礙
智名徧趣行智力又佛自說此力相言苾芻
諦聽佛於一切徧趣行中皆如實知乃至廣
說此意顯佛能如實知趣生死行趣涅槃行
趣生死中有趣地獄乃至趣天趣一一中復
有多種趣涅槃行有三乘別趣一一中復有
多種依摠說一徧趣行名八宿住隨念智力
九死生智力如是二力皆俗智性此二力相
有差別故謂如實知自他過去宿住差別無
罣礙智名第八力若如實知諸有情類於未
來世諸有續生無罣礙智名第九力又佛自
說此二相言苾芻諦聽佛於過去種種宿住

一生二生乃至廣說佛天眼淨超過於人見
諸有情乃至廣說廣辯此二如六通中十漏
盡智力或聲亦顯義有二途若謂但緣漏盡
爲境六智除道苦集他心若謂兼緣漏盡方
便十智爲性理應如是以辯相中言於盡及
爲盡無罣礙智二種俱名漏盡智力又佛自
說此力相言苾芻諦聽佛漏盡故於諸無漏
心慧解脫自現通達具證領受能正自知我
生已盡乃至廣說此後三力即是三通以六
通中此三殊勝在無學位立爲三明在如來
身亦名爲力神境天耳設在佛身亦無大用
故不名力且如天眼能見有情善惡趣中異

孰差別由此能引殊勝智生亦正了知能感
彼業由此建立死生智名神境天耳無此大
用是故彼二不立爲力然不別說他心力者
義已攝在根等力中以他根等中有心心所
故又薄伽梵具一切智於工論等亦得自在
而於佛事齊此已成餘智於中無別勝用是
故雖有亦不別說唯依徧覺十種所知佛所
應爲皆圓滿故何等名曰十種所知謂諸法
中因非因義多分散地業果差別定地功德
品類不同所化有情根解界異所治能治因
果差別前際後際經歷不同離染不續方便
有異但由覺此佛事已成餘設有無不致益

損故唯十種得名爲力又佛觀察所化有情
設教應機唯須十智謂由初智觀所化生於
諸乘中堪無堪異由第二智觀所化生於相
續中業障差別由第三智觀所化生於靜慮
等有味無味煩惱爲障輕重差別由知此二
因亦知異熟障由第四智觀所化生趣清淨
品功能差別由第五智觀所化生於證淨品
加行差別由第六智觀所化生於證淨品稟
志性別由第七智觀所化生諸所施爲有益
無益種種差別正觀修止由第八智觀所化
生過去世中所集差別由第九智觀所化生
當來世中結生差別由第十智觀所化生所

證解脫方便有異於此十智若隨闕一便不
具足化有情事多復無用故不增減已辯自
性依地別者第八第九依四靜慮餘八通依
十一地起欲四靜慮未至中間并四無色名
十一地諸勝德地揔有介所已辯依地依身
別者皆依贍部男子佛身唯此堪爲力所依
故如是十智二乘亦有何故在佛方受力名
夫受力名謂無礙轉佛智於境無礙轉故得
名爲力餘則不然以諸二乘尚不能見諸有
情相續順解脫分善況復能知所餘深細如
舍利子捨求度人不能觀知鷹所逐鴿前後
二際生多少等大目軋連不能觀見業風所

引諸鬼差別是故二乘天眼通等觀界遠近
與佛有殊非無礙故不名爲力二乘與佛漏
盡旣同彼智何緣唯佛名力唯世尊有徧達
有情一切漏盡別相智故謂薄伽梵於諸有
情一切漏盡品類差別智無罣礙二乘不然
是故力名唯屬於佛又唯諸佛智猛利故如
何猛利佛智力能速斷煩惱并習氣故如強
弱力補特伽羅執利鈍刀斬截草等諸有情
類蘊相無別佛如何觀有種種界諸有情類
蘊相雖同而於其中非無差別謂彼諸蘊體
雖無異而有無量品類不同佛如量知都無
罣礙故世尊得有種種界智力或諸如來名

稱高遠希有智慧妙用無邊唯佛能知非餘
所測於餘所了無別相中何怪如來能知別
相已辯諸佛心力方隅當辯菩薩時亦所成
身力頌曰

身那羅延力

或節節皆然

象等七十增

此觸處爲性

論曰佛生身力等那羅延有餘師言佛身支
節一一皆具那羅延力理實諸佛身力無邊
猶如心力能持無上正等菩提大功德故大
覺獨覺及轉輪王支節相連如其次第似龍
蟠結連鎖相鉤故三相望力有勝劣那羅延
力其量去何十十倍增象等十力謂凡象香

象摩訶諾健那鉢羅塞建提伐浪伽遮怒羅
那羅延後後力增前前十倍有說前六十十
倍增敵那羅延半身之力此力一倍成那羅
延力有餘師說此量如千謁羅伐拏天象王
力此象王力其量云何三十三天將遊戲苑
象王知已化作諸頭種種莊嚴往天官所諸天
眷屬數有多千乘已騰空如持樺葉速至戲
苑隨意歡娛天大象王力勢如是此力千倍
等那羅延於諸說中唯多應理如是身力觸
處爲性此應揔是諸觸差別有說唯是大種
差別有說是造觸離七外有有說力是重劣
者是輕如是名爲佛生身力佛四無畏相別

云何頌曰

四無畏如次 初十二七力

論曰佛四無畏如經廣說一正等覺無畏十
智爲性猶如初力二漏永盡無畏六十智性
如第十力三說障法無畏八智爲性如第二
力四說出道無畏九十智性如第七力何緣
諸佛無畏唯四但由此量顯佛世尊自他圓
德俱究竟故謂初無畏顯佛世尊自智圓德
第二無畏顯佛世尊自斷圓德此二顯佛自
利德滿爲顯世尊利他圓德是故復說後二
無畏第三無畏遮行邪道第四無畏令趨正
道謂佛處處爲諸弟子說障法令斷除即是

令修斷德方便又於處處爲諸弟子說出
道令正行即是令修智德方便此二顯佛利他
德滿但由此四隨其所應顯佛自他智斷圓
德至究竟故唯立四種如何可說無畏即智
應言無畏是智所成理實應然但爲顯示無
畏以智爲親近因是故就智出無畏體夫無
畏者謂不怯懼由有智故不怯懼他故智得
爲無畏因性唯佛四妙智是四無畏因謂諸
如來於一切法一切相妙智是初無畏因若
諸如來一切煩惱并習氣斷妙智是第二無
畏因唯我世尊由具此故侵毀不感供讚不
歡雖恒違拒而常饒益雖加斫刺而深憐愍

雖有殊勝輔翼神通智慧伎能而不傲慢於
欲離背不起瞋嫌於樂親承不偏憐愛雖行
攝事不求輔翼雖行訶責不願乖離雖暫駘
擯不以麤語雖永擯黜不令墮邪雖無所畏
而不麤獷雖常親愛而不生貪雖顯自德不
徇名利雖顯他過不為耻辱雖攝門徒不成
自黨雖訶邪侶不壞他朋族望有情數來親
附但示正法不與交遊此等皆由漏盡妙智
故此妙智為第二因若諸如來知弟子衆有
損有益妙智是後二無畏因或無畏體即四
妙智怯懼名畏此即於法無所了達懷恐怖
義智於此畏有近治能與畏相違故名無畏

豈不非無智即是畏體如何說智體即是無
畏此責不然智與多法爲近治故如即無疑
謂智如能近治無智亦於怖畏有近治能故
得智名亦名無畏如治無智亦能治疑故得
智名亦名決定所治無智雖不即疑而智無
疑名二體一如是無智雖與畏殊而無畏名
即目智體一善能斷多惡法故有說無智亦
攝畏體故於此中不應爲難力與無畏有何
差別此無差別體俱智故然於智體別義名
力復依別義立無畏名謂不屈因說名爲力
不怯懼因說名無畏或初安立說名爲力立
已不動說名無畏或非他伏說名爲力能摧

伏他說名無畏有餘師說譬如良醫徧達醫方說名爲力善療衆疾說名無畏有說驍健說名爲力勇悍不怯說名無畏如是二種義亦有別謂成辦事義是力義不怯憚義是無畏義佛三念住相別云何頌曰

三念住念慧

緣順違俱境、

論曰佛三念住如經廣說諸弟子衆一向恭敬能正受行如來緣之不生歡喜捨而安住正念正知是謂如來第一念住諸弟子衆惟不恭敬不正受行如來緣之不生憂感捨而安住正念正知是謂如來第二念住諸弟子衆一類恭敬能正受行一類不敬不正受行

如來緣之不生歡感捨而安住正念正知是
謂如來第三念住雖有所化不敬受行而佛
世尊亦兩法兩由此方便彼於餘時或餘有
情入正法故非前說四今復說三可揔說言
念住有七今三攝在前四中故謂在緣外法
念住攝然此三種體通念慧謂由安住正念
正知於三境中不生歡感不可見有諸大聲
聞於三境中不生歡感便謂此三種非佛不
共法惟佛於此并習斷故善達有情種性別
故或弟子衆隨屬如來有順違俱應甚歡感
佛能不起可謂希奇非屬諸聲聞不起非奇
持故唯在佛得不共名諸佛大悲去何相別

頌曰

大悲唯俗智

資糧行相境

平等上品故

異悲由八因

論曰如來大悲俗智為性普緣一切有情為境作苦苦等三行相故非無漏智有如是理此大悲名依何義立依五義故此立大名一由資糧故大謂大福德智慧資糧所成辦故二由行相故大謂此力能於三苦境作行相故三由所緣故大謂此摠以三界有情為所緣故四由平等故大謂此等於一切有情作利樂故五由上品故大謂最上品更無餘悲能濟此故有餘師說由大加行所證得故唯

大士身所成就故入大功德瓊寶數故能拔
有情大苦惱故立大悲名悲與大悲有何差
別此二差別由八種因一由自性無瞋無癡
自性異故二由依身通餘唯佛依身異故三
田行相一苦三苦行相異故四由所緣一界
三界所緣異故五由依地通餘第四靜慮異
故六由證得離欲有頂證得異故又悲爲先
離染時得惟離染得有差別故七由故濟希
望事成救濟異故八由哀愍平等不等哀愍
異故有餘師說諸佛大悲遠細徧隨能普饒
益聲聞等類所起悲心不能悲愍色無色界
佛於上界起極悲愍心過於二乘悲愍無間

獄已辯佛德異餘有情諸佛相望法皆等不
頌曰

由資糧法身 利他佛相似 壽種性量等

諸佛有差別

論曰由三事故諸佛皆等一由資糧等圓滿
故二由法身等成辦故三由利他等究竟故
由壽種性身量等殊諸佛相望容有差別壽
異謂佛壽有短長種異謂佛生刹帝利婆羅
門種姓異謂佛姓喬答摩迦荼波等量異謂
佛身有大小等言顯諸佛法住久近等如是
有異由出世時所化有情機宜別故諸有智
者思惟如來三種圓德深生愛敬其三者何

一因圓德二果圓德三恩圓德初因圓德復
有四種一無餘修福德智慧二種資糧修無
遺故二長時修經三大劫阿僧企耶修無倦
故三無間修精勤勇猛刹那刹那修無廢故
四尊重修恭敬所學無所顧惜路無慢故次
果圓德亦有四種一智圓德二斷圓德三威
勢圓德四色身圓德智圓德有四種一無師
智二一切智三一切種智四無功用智斷圓
德有四種一切煩惱斷二一切定障斷三
畢竟斷四并習斷威勢圓德有四種一於外
境化變住持自在威勢二於壽量若促若延
自在威勢三於空障極遠速行小大相入自

在威勢四令世間種種本性法令轉勝希奇
威勢威勢圓德復有四種一難化必能化二
荅難必決疑三立教必出離四惡黨必能伏
色身圓德有四種一具衆相二具隨好三具
大力四內身骨堅越金剛外發神光踰百千
日後恩圓德亦有四種謂令永解脫三惡趣
生死或能安置善趣三乘揔說如來圓德如
是若別分析則有無邊唯佛世尊能知能說
要留命行經多大劫阿僧企耶說乃可盡如
是則顯佛世尊身具有無邊殊勝奇特因果
恩德如大寶山有諸愚夫自乏衆德雖聞如
是佛功德山及所說法不能信重諸有智者

聞說如斯生信重心徹於骨髓彼由一念極
信重心轉滅無邊不定惡業攝受殊勝人天
涅槃故說如來出現於世爲諸智者無上福
田依之引生不空可愛殊勝速疾究竟果故
如薄伽梵自說頌言

若於佛福田

能植少分善

初獲勝善趣

後必得涅槃

已說如來不共功德共功德今當辯頌曰

復有餘佛法

共餘聖異生

謂無諍願智

無礙解等德

論曰世尊復有無量功德與餘聖者及異生
共謂無諍願智無礙解通靜慮無色等至等

持無量解脫勝處徧處等隨其所應謂前三
門唯共餘聖通靜慮等亦共異生雖佛身中
一切功德行相清淨殊勝自在與聲聞等功
德有殊然依類同說名爲共且共餘聖三功
德中無諍云何頌曰

無諍世俗智

後靜慮不動

三洲緣未生

欲界有事惑

論曰有阿羅漢憶昔多生受雜類身發自他
或由斯相續受非愛果便作是念有煩惱身
緣之起惑尚招苦果況離煩惱具勝德身思
已發生如是相智由此方便令他有情不緣
己身生貪瞋等此智但以俗智爲性緣他未

來修斷惑故非無漏智此行相轉若無諍體
是智所攝如何說習無諍等於此不相違一
相應品有多功德隨說一故如一山中有種
種物隨舉一種以標山名理應無諍是智所
攝護他相續當來惑生巧便為先事方成故
然一切諍摠有三種蘊言煩惱有差別故蘊
諍謂死言諍謂鬪煩惱諍謂百八煩惱由此
俗智力能止息煩惱諍故得無諍名此智但
依第四靜慮違苦因故第四靜慮樂通行中
最為勝故不動應果能起非餘餘尚不能自
防起惑況能止息他身煩惱此唯依止三洲
人身非北及餘性猛利故緣欲未起有事惑

生勿令他惑緣我生故諸無事惑不可遮防
內起隨應揔緣境故已辯無諍願智云何頌曰
願智能徧緣 餘如無諍說

論曰以願爲先引妙智起如願而了故名願
智此智自性地種性身與無諍同但所緣別
以一切法爲所緣故如何願智能知未來審
觀過現而比知故如觀稼穡有盛有微比知
其田有良有薄若尔何故立願智名有學異
生亦能知故不尔所知定不定故而聞傳說
諸大聲聞說未來事有不定者非起願智有
此謬知餘俗智觀所記別故或彼所記無不
定失但觀於始不觀終故如先降雨未至地

間為羅怛羅之所承弃先所懷孕其實是男
彼於後時轉形成女王舍城鬼初戰得勝後
為廣嚴諸鬼摧伏人欲相伐鬼先戰故或實
願智方見未來然加行時先起比智觀過現
世准度未來引願智生方能真見即由此故
能知無色謂先觀彼因行等流有比智生引
真願智或觀欲色死生時心比度而知所生
從處引生願智方能實知或比智知亦無有
失以證比智所緣必同若比不知如何能證
是則願智應不可言力能徧緣三界三世不
時解脫諸阿羅漢欲於彼境正了知時先作
要期願我知彼後入邊際第四靜慮以為加

行從此無間如先願力引正智起於所期境
皆如實知邊際定言如後當釋此願智力能
知過去與宿住智差別云何願智通知自相
共相諸宿住智知共非餘知共相中亦有差
別願智明了宿住不然於現所緣對他心智
辯差別相如理應思

說一切有部順正理論卷第七十五 操

過於葛中天下於逮逮上音代方隅下音負賀

二同莫課苗幼鷹於陵側昌側恠恠蟠結上音

盤鎖鎖鎖二同蘇敵徒的藹於害拏尼加苑紆

反樺業上胡歡娛下音違拒下音斫刺上若反之

證	下反	智	勇	丑	刃	亦	下
反	余	踰	悍	律	反	反	七
		逾	汗	反	下	輔	翼
		標	音	鹿	獷	父	上
		反	必	怯	憚	猛	下
		稼	下	反	俱	伎	能
		穡	徒	劫	殉	徇	備
		下	且	反	詞	閑	反
		音	反	喬	駢	健	告
		色	嬌	上	其	企	耶
		羅	下	反	武	也	堯
		怙	音	懷	孕		
		日					



